

為已與大臣議為以拒公論臣等未解伏願 殿下亟收成命以快公
論傳曰今見劄子安瑋倡之於前長 坤和之於後若長 坤亦倡之於前
則其罪固大矣而和之於後故既已罷職矣還收職牒甚不可也尹殷
弼徐厚等事不允之意已盡言之○夜 坤方南方有氣如火○丙午臺
諫合司三啓前事傳曰頃者年少輩駁人太過故後有物論今又若此
不已則將或有物論於後且長 坤久為大臣若盡奪職則將至為學生
尤不當還收徐厚尹殷弼若適侍從則是棄人物也四啓不見○御夕
講○觀象監啓曰去夜有氣見西南如火氣至曉乃銷考之文獻通考
乃猛將之氣云傳曰此非常之災雖不可指為某事之應上下所當恐
懼修省○丁未 御朝講講續通鑑綱目元成宗紀至禁諸王駙馬奪
民之田檢討官沈思遜曰頃者孝惠公主以放牛場折受事上言此乃
有關於馬政非如閑曠之地豈可許人耕墾 上曰凡上言必下該司
則其許與否在該司非若奪民田之例今又提調防之故已令不許矣
然此言則是領事權鈞曰元時法制不備故有如此之事然馬政固不
可緩也今甚者亦有請受堤堰者一聞其端則後之有力者皆將折受
而民無灌溉之利如牧場及堤堰等地不可以閑曠而妄授人也○右